

1 JOHN

Tahi Lede a John

Di haga modongoohia:

Ilodo *Tahi lede a John* nia mee llauehe elua no lodo: (1) E hagamaha anggi digau ala e dau di beebaa deenei gi mouli hagadaubuni anggi God mo dana Dama go Jesus Christ. (2) E bule digaula gi de daudali nia agoago tilikai ala ga hagahuaidu di hagadaubuni deenei. Nia agoago tilikai aanei nedaamada mai di agoago dela e hai boloo: Di huaidu gaa hana gi lodo tangada dela e buni anga gi henuailala, dela ne hidi ai bolo Jesus go Tama a God digi hai tangada henuailala. Digau ala e agoago nia agoago aanei e helekai boloo: Tangada maga haga mouli la hagalee haga dahidaamee dono mouli i henuailala nei, gei digaula e agoago labelaa boloo: Di haga mouli o tangada la hagalee go nia mee aanei: Nia hangaahai donu be hai gee, be go di aloho anggi tangada dela i dono baahi.

Idimaa John e hai baahi ginia agoago aanei, geia e helekai aga e haga modongoohia bolo Jesus guu hai tangada, gei e hagamaaloo aga labelaa bolo digau huogodoo ala e hagadonu a Jesus mo di aloho i God, la koia e hai loo gi hagadau a aloho i nadau mehanga.

Di hagahonu di beebaa deenei:

Di haga modongoohia (1.1-4)

Di maalama mo di bouli (1.5–2.29)

Nia dama a God mo nia dama a Setan (3.1-24)

Di tonu mo tilikai (4.1-6)
 Nia hegau o di aloho (4.7-21)
 Di hagadonu dela e aali (5.1-21)

Nnelekai o di mouli

¹ Gimaadou ehihi adu gi goodou idi hai o Nnelekai di mouli dela nogo noho mai taamadaloo. Gimaadou gulongono di maa, gu gidee. Uaa, gimaadou gu mmada, gu bili gi Mee.* ² Di mouli deenei gu gila aga, ge gu mmada ginai gimaadou, gei gimaadou e helekai i di maa, ge e ago ago adu gi goodou di mouli dee odi, dela gu i baahi o Tamana, dela gu haga modongoohia mai gi gidaadou.* ³ Madau mee ne mmada ge ne hagalongo gi Mee, aanei madau mee e hagi adu gi goodou, bolo goodou gi madalia gimaadou e bunianga gi God mo dana Dama go Jesus Christ. ⁴ Gimaadou ehihi nia mee aanei, bolo gii dohu dogomaalia ai tadau tene.

God go di maalama

⁵ Gimaadou e ago ago adu gi goodou di ago ago deenei, dela gulongono ai gimaadou mai baahi Tama a God, boloo: God lago di maalama, di bouli i dono baahi ai. ⁶ Maa gidaadou ga helekai boloo, “Gidaadou e bunianga gi Mee”, gei gidaadou e heehee hua ilodo di bouli, gei tadau helekai mo tadau hangaahai le e tilikai. ⁷ Maa gidaadou ga heehee ilodo di maalama, gadoo be Mee dela enoho ilodo di maalama, malaa, gidaadou gu hagadaubuni, gei nia dodo o dana

* **1.1:** John 1.1 * **1.2:** John 1.14

Dama go Jesus ga haga madammaa tadau huaidu huogodoo.

⁸ Maa gidaadou ga helekai boloo, “Gidaadou tadau huaidu ai”, gidaadou le ebida halahala hua gidaadou, gei di tonu hogi la hagalee i tadau baahi. ⁹ Maa gidaadou ga hagi anga gi God tadau huaidu, gei Mee ga haga gila aga dana hagababa, ga hai di mee dela edonu, ga haga madammaa tadau huaidu. ¹⁰ Maa gidaadou ga helekai boloo, “Gidaadou tadau huaidu ai,” malaa, gidaadou e haga tilikai a God, ge ana helekai hogi la hagalee i tadau baahi.

2

Christ go tadau hagamaamaa

¹ Au e hihi adu gi goodou, agu dama hagaloho, bolo goodou hudee heia di huaidu. Maa tangada ga hai di huaidu, gidaadou tadau Dangada Hagamaamaa i baahi o God, deenei go Jesus Christ, go Mee dela edonu. ² Tigidaumaha o Christ la di mee dela e hui ai tadau huaidu, hagalee go tadau huaidu la hua, mo nia huaidu o nia daangada hen-uailala hagatau.

³ Maa gidaadou ga daudali nia haganoho a God, gidaadou e donu bolo gidaadou la gu iloo a Mee. ⁴ Maa tangada ga helekai boloo, “Au e iloo a Mee”, geia hagalee hagagila aga nnaganoho a God, mee e helekai tilikai, gei di tonu la hagalee i dono baahi. ⁵ Maa tangada ga daudali ana helekai, deenei go mee dela guu dohu dono aloho i God. Deenei di mee ga iloo gidaadou, bolo gidaadou gu buni anga gi God: ⁶ Maa tangada ga helekai

boloo, “Au e buni anga gi God”, geia gi mouli be di mouli o Jesus Christ.

Taganoho hoo

⁷ Ogu ihoo hagaalohonei, taganoho deenei dela ne hihi adu gi goodou, hagalee taganoho hoo, gei taganoho namua dela guulawa di iloo goodou mai taamada. Go taganoho namua dela ne agoago ai, ge gu longono ai goodou.* ⁸ Gei deeai, taganoho deenei dela e hihi adu gi goodou le e hoo, idimaa, ono donu la gu kila mai i baahi o Christ mo mai godou baahi. Di bouli le e mmaa gi daha, gei di maalama donu gu lawa di maahina.

⁹ Maa tangada ga helekai bolo ia e noho i lodo di maalama geia e hagadugina gi dono duaahina, ia enohohua ilodo di bouli gaadaemailoo gi danginei. ¹⁰ Tangada dela e aloho i dono duaahina, deela tangada enohohua ilodo di maalama, ia edeeme di hai tangada deela giihala. ¹¹ Tangada dela e hagadugineia dono duaahina, ia enohohua ilodo di bouli, ge eheehehua ilodo di bouli. Edeilooia di gowaa dela belee hana ginai, idimaa, di bouli gu haga dee gida a mee.

¹² Au e hihi adu gi goodou, agu dama, idimaa, godou huaidu la guulawa di maahede i di ingoo o Christ.

¹³ Au e hihi adu gi goodou, nia damana, idimaa, goodou e iloo a Mee dela nogo noho mai taamada.

Au e hihi adu gi goodou, nia dama daane, idimaa, goodou ala gu haga magedaa Tangada Huaidu.

* **2.7:** John 13.34

¹⁴ Au e hihi adu gi goodou, agu dama, idimaa, goodou gu iloo Tamana.

Au e hihi adu gi goodou, nia damana, i di godou iloo a Mee dela nogo noho mai taamada.

Au e hihi adu gi goodou, nia dama daane, idimaa, goodou ala e maaloo. Nia helekai a God e noho i godou lodo, gei goodou gu haga magedaa Tangada Huaidu.

¹⁵ Goodou hudee aloho i henuailala, be nia goloo o henuailala. Maa goodou ga aloho i henuailala, goodou hagalee aloho i Tamana.

¹⁶ Idimaa, nia mee huogodoo o henuailala, aanei la go di hiihai huaidu o tuaidina, mo nia mee o nia daangada e mmada ginai ga moinaa ai, mo nia mee huogodoo koia e hagapuu ai nia daangada, nia mee aanei huogodoo hagalee neloomoi ibaahi o Tamana, neloomoi hua i henuailala.

¹⁷ Henuailala mo ono mee huogodoo ala e hiihai ginai nia daangada, le e mmaa gi daha huogodoo, gei tangada dela e hai di manawa o God, le e mouli, gaa hana hua beelaa.

Di hagadaumee o Christ

¹⁸ Agu dama nei, di madagoaa o di hagaodi la gu hoohoo mai. Goodou gulongono bolo di hagadaumee o Christ la ga hanimo. Dolomeenei nia hagadaumee o Christ gulogowaahee, gu kila mai, ge gidaadou gu iloo bolo di hagaodi la gu hoohoo mai. ¹⁹ Nia hagadilinga daangada ala beenei, la hagalee dau mai gi gidaadou, dela ne hula ai digaula gi daha. Maa nei bolo digaula ne dau mai gi gidaadou, digaula e buni mai gi gidaadou. Gei digaula guu hula gi daha mo

gidaadou, e gila mai bolo ginaadou hagalee dau mai gi gidaadou.

²⁰ Goodou huogodoo guukae di Hagataalunga Dabu a Christ dela negowadu gi goodou, malaa goodou gu iloo di tonu. ²¹ Au e hihi adu gi goodou, hagalee bolo goodou e de iloo nia mee ala e donu. Au e hihi adu idimaa goodou gu iloo hua di tonu, gei goodou gu iloo bolo nia dilikai hagalee ne lloomoi i di tonu.

²² Malaa koai dela etilikai? Go tangada dela ehelekai, “Jesus hagalee go Messiah.” Malaa tangada deenei la di hagadaumee ni Christ, dela e haga de iloo ia Tamana mo Tama.

²³ Tangada dela ga haga de iloo ia Tama, geia ne haga de iloo ia labelaa Tamana. Gei tangada dela e hagadonu Tama, geia ne hagadonu labelaa Tamana.

²⁴ Hagamaha hagamau dangihi ina godou lodo gi nia agoago ala gulongono ai goodou mai taamada. Maa nia agoago aanei ga mau dangihi i godou lodo, gei godou mouli ga bunianga gi di Tama mo Tamana i nia madagoaa huogodoo. ²⁵ Di mee a Christ ne hagababa mai gi gidaadou, la go di mouli dee odi.

²⁶ Au e hihi adu gi goodou nia mee aanei i di hai o digau ala e hagamada belee halahalau goodou.

²⁷ Gei Christ ne hagenda dana Hagataalunga Dabu adu gi goodou. Di noho di Hagataalunga Dabu i godou lodo, gei goodou hagalee bolo goodou e hai gii kabe godou mee mai tangada, idimaa, di Hagataalunga Dabu e agoago adu gi goodou di hai o nia mee huogodoo, modi agoago adu gi goodou nia mee koia e donu, hagalee dilikai.

Malaa goodou gi hagalongo gi nia agoago di Hagataalunga, gei gi mau dangihi ang gi Christ.

²⁸ Agu dama nei, goodou dadaahia hua beelaa i di hagadaubuni ang gi Mee i dono madagoaa dela maga hanimoi ai, gei gidaadou emaloo dangihi huoloo, hagalee pala hagammuni, be e langaadia i ono mua i dilaangi deela. ²⁹ Goodou gu iloo bolo Christ le e donu. Goodou gi iloo labelaa bolo digau huogodoo ala e hai nia mee donu, guu hai nia dama ni God.

3

Nia dama a God

¹ Goodou mmada gi tamanaiee o di aloho o Tamana i gidaadou. Dono aloho e damanaiee huoloo, gaa hidi ai gidaadou ga haga ingoo bolo nia dama ni God, deenei le e donu! Dela di mee ne hidi ai digau henuailala e de iloo ginaadou gidaadou, idimaa, digaula e de iloo a God.* ² Ogu ihoo hagaaloho nei, dolomeenei gidaadou guu hai nia dama ni God, gei digi modongoohialoo be gidaadou gaa hai behe. Malaa, deenei di mee gu iloo gidaadou bolo di madagoaa o Christ dela maga hanimoi ai, gei gidaadou gaa hai gadoo be Mee, idimaa, gidaadou gaa mmada, gaa donu bolo ma go Mee. ³ Tangada maga hagadagadagee gi Christ beenei, geia gii bida haga madammaa ina eia gii hai gadoo be Christ dela e madammaa.

⁴ Tangada dela e hai di huaidu, geia neoho nnaganoho a God, idimaa, go di huaidu dela e hai baahi gi nia haganoho. ⁵ Goodou gu iloo

* **3.1:** John 1.12

bolo Christ ne hanimoi belee daa gi daha tatau huaidu, gei Mee ono huaidu ai.* ⁶ Tangada magaa bunianza gi Christ, la hagalee noholoo ilodo di huaidu. Tangada dela hua e noho ilodo di huaidu, la digi gidee ia a Christ, ge hagalee e iloo a Mee.

⁷ Nia dama nei, goodou hudee dumaalia anggi dahi dangada gi halahalauina goodou. Maa tangada gaahai nia mee donu, deela tangada e donu, gadoo be Christ dela koia e donu. ⁸ Tangada dela e noho ilodo di huaidu, ia tama ni Setan, idimaa, Setan gu ihala mailoo itaamada. Gei Tama a God ga hanimoi, dono hadinga bolo e hunahuna nia hegau a Setan.

⁹ Nia dama a God la hagalee noho ilodo di huaidu, idimaa, di mouli o God la guu noho i nadau lodo. God go di nadau Damana, gei digaula e deemee di haihai di huaidu. ¹⁰ Di hai geegee i nia dama a God mo nia dama a Setan, le hai bolo tangada dela hagalee hai nia mee ala e donu ge hagalee e aloho i nia daangada, ia hagalee tama ni God.

Di hagadau aaloho

¹¹ Deenei di agoago gulongono ai goodou mai taamada, bolo gidaadou e hai gi hagadau aaloho.* ¹² Gidaadou hudee hai be Cain dela ne dau gi Setan, dela ne daaligi dono duaahina daane go Abel. Cain la ne aha dela ga daaligi dono duaahina? Idimaa, ana hangahaihai le e hala, gei nia hangahaihai o dono duaahina le e donu.*

* **3.5:** John 1.29 * **3.11:** John 13.34 * **3.12:** Genesis 4.8

13 Ogu duaahina nei, goodou hudee homouli maa digau henuailala ga hagadugina e ginaadou i goodou. 14 Gidaadou guiloo bolo gidaadou guutanga gidaha modi made anggi di mouli, idimaa, gidaadou e aloho i tadau duaahina. Maa tangada dono aloho ai, ia enohohua ilala nia mogobuna odi made.* 15 Tangada dela ga de hiihai gi tangada dela igolo, la tangada daaligi dangada. Goodou guiloo bolo tangada daaligi dangada le e deemee di hai mee gi di mouli dee odi. 16 Deenei di mee ga iloo gidaadou be di aloho la di aha: Christ gu dugu anga dono mouli i gidaadou, gei gidaadou gi dugu anga labelaa tadau mouli gi tadau duaahina daumaha! 17 Maa tangada maluagina ga gidee ia dono duaahina e haingadaa anggi deia, gei mee hagalee e aloho i mee, malaa dehee dana hai bolo ia e aloho i God? 18 Agu dama nei, tadau aloho hudee heia hua ginia helekai. Gi heia idi aloho e donu dela e modongoohia mai i lodo tadau hangaahai.

Tuu maaloo i mua o God

19 Deenei di mee ga iloo gidaadou bolo gidaadou digau ni di tonu, gaa hai tadau manawa gii donu i di aumaalia i mua o God. 20 Maa tadau manawa le e hagahuaidu gidaadou, gei gidaadou e iloo bolo God dela koia e aamua i tadau manawa, e iloo la nia mee huogodoo. 21 Ogu ihoo hagaaloho, maa tadau manawa la hagalee hagahuaidu gidaadou, gidaadou e mee di tuu maaloo i mua o God. 22 Gidaadou e hai mee ginia mee huogodoo

* **3.14:** John 5.24

ala e tangiai gidaadou gi Mee, i tadau hagalongo gi ana haganoho modi hai nia mee ala e hagatenetene dono manawa. ²³ Deenei dana haganoho bolo gidaadou gi hagadonu di ingoo o dana Dama daane go Jesus Christ, modi hagdau aaloho be dana hai dela gu hagna noho mai gi gidaadou.* ²⁴ Tangada dela e daudali nia haganoho a God, le e noho i baahi o God, gei God le e noho labelaa i dono baahi. Gei deenei di hai dela e iloo ai gidaadou bolo God le e noho i tadau baahi, idimaa, Mee ne dugu mai dono Hagataalunga gi gidaadou.

4

Di hagataalunga e donu mo di hagataalunga tilikai

¹ Ogu ihoo hagaloho nei, hudee hagadonu ina digau huogodoo ala e helekai bolo di Hagataalunga Dabu le enoho i nadau baahi. Goodou hagadina ina bedi hagataalunga dela i baahi digaula lago di Hagataalunga ne hanimoi i baahi o God, idimaa, elogo nia soukohp dilikai guu hula gu modoho i henuailala. ² Deenei di godou mee ga iloo ai be di maa go di Hagataalunga o God: Go tangada dela e hai bolo Jesus Christ guu hai tangada, deenei go mee e hai mee gi di Hagataalunga dela ne hanimoi i baahi o God. ³ Tangada ga hagna de iloo nia mee aanei i di hai o Jesus, geia dono hagataalunga mai baahi o God ai. Gei di hagataalunga dela i baahi o mee la ne hanimoi i baahi di hagadaumee o Christ,

* **3.23:** John 13.34; 15.12,17

deelaa gu longono goodou bolo ga hanimoi, gei deelaa gu hanimoi, gei mee gu i henuailala dolomeenei.

⁴ Agu dama hagaaloho nei ala go nia dama a God, goodou gu haga paagege nia soukohp dilikai, idimaa, di Hagataalunga dela e noho i godou lodo, la koia e maaloo i di hagataalunga dela i lodo digau ala e dau gi henuailala. ⁵ Nia soukohp dilikai e leelee hua i nia mee o henuailala, gei digau henuailala e hagalongo gi digaula, idimaa, digaula digau ni henuailala. ⁶ Gidaadou nia dama ni God. Tangada ma ga iloo ia God, geia e hagalongo mai gi gidaadou. Tangada dela hagalee tama ni God, geia hagalee hagalongo mai gi gidaadou. Deenei di mee ga iloo ai gidaadou di hai geegee mehanga di Hagataalunga o di tonu, mo di hagataalunga tilikai.

God go di aloho

⁷ Ogu ihoo hagaaloho nei, gidaadou gi hagadau aaloho, idimaa, di aloho ne daamada mai baahi o God. Tangada dela e aloho, ia di tama ni God, e iloo a God. ⁸ Tangada dela dono aloho ai, le de iloo a God, idimaa, God lago di aloho. ⁹ Deenei di hai a God ne haga modongoohia mai dono aloho gi gidaadou: Mee ne hagau mai dana Dama hua e dahi gi henuailala, bolo gi mouli ai gidaadou. ¹⁰ Deenei di hai o di aloho: hagalee go gidaadou ne daamada ne aloho i God, go Mee ne daamada ne aloho i gidaadou, ne hagau mai dana Dama belee hai ai tigidaumaha e hui tadau huaidu.

¹¹ Ogu ihoo hagaaloho nei, maa deenei di hai o di aloho o God i gidaadou, gidaadou

gi hagadaubuni i di aloho. ¹² Tangada ne gidee a God ai, gei di maa gidaadou ga hagadaubuni i di aloho, malaa, God enoho i tadau lodo, dono aloho e honu humalia i tadau lodo.* ¹³ Gei gidaadou gailoo bolo gidaadou enoho ibaahi o God, gei Mee enoho i tadau lodo, idimaa, God gu dugumai dono Hagataalunga gi gidaadou. ¹⁴ Gidaadou gu gidee, gu hagianga gi digau ala i golo, bolo Tamana la gu hagau mai dana Dama, belee hai di Hagamouli ni henuailala. ¹⁵ Tangada dela ma ga haga modongoohia bolo Jesus la go Tama a God, gei God gaa noho i ono lodo, gei mee e bunianga gi God. ¹⁶ Gidaadou gu iloo, ge gu hagadonu di aloho o God i gidaadou.

God go di aloho. Tangada maga mouli i di aloho, geia e bunianga gi God, gei God e bunianga gi mee. ¹⁷ Deenei tadinga o di aloho dohu dogomaalia i tadau lodo, bolo gi de mmaadagu gidaadou i di Laangi Hagiaga, idimaa, tadau mouli i henuailala e mouli be Christ. ¹⁸ Di madagu i lodo di aloho ai, di aloho dogomaalia le e hagabaginia mmaadagu huogodoo. Deeneilaa, di aloho la hagalee dogomaalia i baahi digau mmaadagu, idimaa, di madagu la di mee ni di hagaduadua.

¹⁹ Gidaadou e aloho, idimaa, God ne daamada ne aloho i gidaadou. ²⁰ Maa tangada ga helekai, “Au e aloho i God”, gei mee e dehihai gi dono duaahina, malaa, mee tangada hai kai tilikai. Maa tangada e hagalee aloho i dono duaahina dela egidee ia, geia e deemee di aloho i God dela e de gidee ia. ²¹ Deenei taganoho a Christ dela

* **4.12:** John 1.18

ne gaamai gi gidaadou: Be koai hua dela e aloho i God, geia gi aloho labelaa i dono duaahina!

5

Tadau aali i henuailala

¹ Be koai hua dela e hagadonu bolo Jesus la go di Mesaia, geia di tama ni God. Ma koai dela e aloho i Tamana, geia e aloho labelaa i Tama. ² Deenei di hai ga iloo bolo gidaadou e aloho i nia dama a God: gidaadou e aloho i God ge e daudali ana haganoho. ³ Di aloho i God la go tadau daudali ana haganoho. Ana haganoho la hagalee haingadaa. * ⁴ Idimaa, nia dama a God huogodoo e mee di haga magedaa henuailala. Gei gidaadou e haga magedaa henuailala gi tadau hagadonu. ⁵ Ma koai dela e mee di haga magedaa henuailala? Go tangada hua dela e hagadonu a Jesus, bolo Mee Tama ni God.

Nia hagadootonu i Jesus Christ

⁶ Jesus Christ go Tama a God ne hanimoi e haga modongoohia go nia wai o dono babdais mo di hali ono dodo. Hagalee go nia wai la hua, nia wai mo ono dodo. Di Hagataalunga Dabu e haga modongoohia di mee deenei, bolo e donu, idimaa, di Hagataalunga le e donu. ⁷ Nia hagadootonu o Jesus le e dolu: ⁸ di Hagataalunga, nia wai, mo nia dodo. Nia mee e dolu aanei e haga modongoohia di mee e dahi. ⁹ Gidaadou e hagadonu nia haga modongoohia mai baahi nia daangada, gei nia haga modongoohia a God idi gili dana Dama la koia e maaloo. ¹⁰ Tangada ma ga hagadonu Tama a God, gei di

* **5.3:** John 14.15

haga modongoohia deenei la i ono lodo. Gei tangada dela hagalee hagadonu a God, geia ne haga tilikai a God, idimaa, ia hagalee hagadonu di haga modongoohia a God ne hai i di gili dana Dama. ¹¹ Di haga modongoohia la deenei: God gu gaamai di mouli dee odi, gei di mouli deenei la i baahi dana Dama.* ¹² Maa tangada e hai mee gi Tama, geia e hai mee gi di mouli deenei. Maa tangada hagalee hai mee gi Tama a God, geia dono mouli ai.

Di mouli dee odi

¹³ Au ehihiadu gi goodou ala gu hagadonu di ingoo Tama a God, bolo gi iloo bolo goodou e hai mee gi di mouli dee odi. ¹⁴ Dela tadau mee ga dee mmaadagu ai gidaadou i mua o God, idimaa, gidaadou e hagadonu bolo Mee e longono tadau dangidangi, maa gidaadou ga tangi anga be dana hiihai. ¹⁵ Maa gidaadou ga hagadonu bolo Mee e longono tadau dangidangi i nia mee huogodoo, gei gidaadou ga iloo labelaa bolo Mee e dugu mai gi gidaadou tadau mee ala e tangi ai.

¹⁶ Maa tangada gaa mmada gi dono duaahina e hai di huaidu dela hagalee hidi ai di made, geia gi dalodalo anggi God, gi dugu anga gi mee di mouli. Di mee deenei anggi digau nadau huaidu i golo, gei nadau huaidu ga hagalee dagi ginaadou gi di made. Gei di maa di huaidu i golo dela e hidi ai di made, gei au hagalee hai adu gi goodou bolo gi dalodalo anggi God i di huaidu deela. ¹⁷ Nia haihai hala huogodoo la nia huaidu, gei di maa di huaidu i golo e hagalee dagi gi di made.

* **5.11:** John 3.36

18 Gidaadou gu iloo bolo tangada dela guu hai di tama a God, la hagalee haihai di huaidu, idimaa, Tama a God e madamada humalia i mee, gei di huaidu e deemee di tale gi mee.

19 Gidaadou gu iloo bolo gidaadou nia dama ni God, ma e aha maa henuailala hagatau la gu i lala nia mogobuna o tangada huaidu.

20 Gidaadou gu iloo bolo di Tama a God la ne hanimoi, ne hai gidaadou gi iloo nia mee, bolo gidaadou gi iloo di God e donu. Gidaadou gu hagadaubuni anggi di God e donu, i tadau mouli hagadaubuni gi dana Dama go Jesus Christ. Deenei di God donu, ge deenei di mouli dee odi.

21 Agu dama nei, haga mogowaa ina goodou gi daha mo nia balu god tilikai!

Beebaa Dabu
The Holy Bible in the Kapingamarangi language of the
Federated States of Micronesia, spoken on the
Kapingamarangi and Ponape islands, Caroline Islands

Copyright © 1996, 2014 The Kapingamarangi Bible translation committee

Language: Kapingamarangi

Translation by: The Kapingamarangi Bible translation committee

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-04-24

PDF generated using Haiola and XeLaTeX on 21 Feb 2024 from source files dated 31 Aug 2023

28201f3a-53b9-559a-9b49-00a6f40bcb2a